

34avla radunanza dals participants da la BCG

La Banca Chantunala Grischuna conferma sia posiziun da leader sin il martgà

Cuira, ils 4 da matg 2019 – Var 2300 giasts èn sa radunads sonda en la Halla da la citad da Cuira per la 34avla radunanza dals participants da la Banca Chantunala Grischuna (BCG). Per la davosa giada ha preschentà Alois Vinzens il resultat annual da la BCG a las participantas ed als participants. Il CEO che sa retira il settember ha danovamain pudì preschentar in resultat da record.

L'onn da gestiun 2018 è la BCG puspè creschida fermamain. La banca ha realisà cun in gudogn dal concern da CHF 185.1 miu. ina giada dapli in resultat da record. Grazia al resultat excellent ha la dividenda per scrit da participaziun da 40 francs pudì vegnir mantegnida. En tut ha la BCG distribuì 100 milliuns francs al chantun Grischun ed a participantas e participants.

Success al martgà

Ils motors da la creschientscha èn stads la strategia da diversificaziun cun engrondir la fatschenta d'investiziuns e la fatschenta d'administrar la facultad, per l'emprima giada la consolidaziun cumplaina da l'Albin Kistler AG ed investiziuns en projects d'innovaziun prosperaivels. «Grazia a quests resultats pudain nus confermar nosa posiziun da leader sin il martgà dal Grischun», ha ditg il CEO Alois Vinzens cun plaschair. Ina da las pli grondas sfidas resta la midada digitala. Il 2018 ha la BCG mess en il center da la digitalisaziun l'augment da la mobilitad, da la segirtad e da la cussegliaziun. «Malgrà ina digitalisaziun adina pli ferma resta l'attaschadadad persunala per nus impurtanta», ha suttastritgà Alois Vinzens. Questa attaschadadad mussa la BCG era cun ses engaschi via il fond da contribuziun, cun las activitads da sponsuradi e las stentas da promover l'art, sco era cun la lavur voluntara da la banca. L'onn 2018 ha la BCG investì en total trais milliuns francs per projects en e per il Grischun. Per l'onn current quinta la banca sin fundament da la situaziun constanta dal tschains negativ cun ina leva sminuziun dal resultat da fatschenta.

Ina percepziun pli ferma sco banca d'investiziuns

Il president da banca Peter Fanconi ha accentuà il posiziunament pli cler e la percepziun pli ferma da la BCG sco banca d'investiziuns. Il 2018 ha la BCG lantschà gia ses otgavel fond. «Tar tut ils products dain nus paisa a la performance ed a la segirezza. Noss fonds d'investiziuns en aczias èn sa sviluppad durant l'onn da gestiun blier meglier che lur index u che products cumparegliabels senza che nus avessan stuì ans exponer ad ulteriuras ristgas», ha ditg Peter Fanconi. Quai confermia la cumpetenza dals managers da fonds en il Center d'investiziuns da la BCG. L'entschatta dal 2019 ha la BCG ultra da quai lantschà in nov mund d'investiziuns cun set soluziuns d'investiziun adattadas als basegns e cun in assistent d'investiziun digital. Medemamain ha la BCG cuntinuà a modernisar sias filialas. L'onn 2018 èn vegnidas renovadas las sedias regionalas a Landquart, Domat e Tusaun. A Flem ha la BCG dischlocà sia filiala en la surbajegiada nova STENNA. Il 2019 vegnan modernisadas las sedias regionalas a Scuol, San Murezzan e Lai.

Cumià dad Alois Vinzens

A la fin da la part uffiziala ha il president da banca Peter Fanconi prendì cumià da CEO Alois Vinzens. Suenter var 17 onns surdat Alois Vinzens la fin da settember la direcziun operativa da la BCG a Daniel Fust.

Fanconi ha undrà ses merits da blers onns e sia lavur excellenta en favur da la BCG. «La BCG è sa sviluppada sut la direcziun dad Alois Vinzens ad ina banca moderna e digitala. Cun visiuns e perspicacità ha el marcà la BCG», ha ditg Fanconi. El saja adina restà cun ils pes sin terra ed avert per ses ambient. Daniel Fust, commember da la direcziun generala dapi il 2012, surpiglia la direcziun operativa da la BCG per il 1. d'october 2019.

Metter accents cun il giubileum da la BCG

La BCG festivescha il 2020 ses giubileum da 150 onns sut il motto «Metter accents durabels per l'avegnir». A la radunanza da las participantas e dals participants ha il president da banca Peter Fanconi preschentà il logo da giubileum #gkb2020 ed ha laschà metter online la pagina-web da giubileum gkb2020.ch. L'emprim project da giubileum preschentà sensibilisescha la populaziun per la natira: la BCG vegn ad equipar 150 pizs grischuns da passa 2020 m s.m. – resguardond l'onn da giubileum e la vegliadetgna da la banca – cun cudeschs dals pizs online, per che Grischunas e Grischuns possian giudair lur muments culminants persunals sin ils pizs ed als parter en il cudesch electronic dals pizs sut gkb2020.ch. Las ulteriuras activitads da giubileum vegnan preschentadas il settember 2019.

Puncts culminants musicals e culinaries

Per il divertiment musical han procurà Samuel Zünd cun ses Sam Singers, accumpagnads da la Kammerphilharmonie Grischun. L'ensemble ha sunà en l'emprima part da la radunanza ils pli gronds hits da Vico Torriani, en la segunda part chanzuns popularas dals onns 1920 fin 1950. Per ina finiziun nunemblidaivla dal program da divertiment ha procurà la represchentaziun ospitanta da Marco Ettisberger, in anteriur commember da la furmazion originala dals Nilson Brothers, cun la chanzun «Aber dich gibt's nur einmal für mich». Sco mintg'onn ha la musica instrumentala da la BCG cun ses dirigent Hendri Riedi avert l'occurrenza. Ils giasts èn danovamain vegnids pupragnads culinaricamain da Christoph Tobler e ses team che han survegnì in applaus frenetic, cura ch'els han preschentà il dessert.

Contact per ils collavuradors da medias e per investurs:

Banca Chantunala Grischuna, Medias & Investor Relations, chascha postala, 7001 Cuira

Thomas Müller, thom.mueller@gkb.ch, telefon +41 81 256 83 11

Nadja Maurer, nadja.maurer@gkb.ch, telefon +41 81 256 88 01

La Banca Chantunala Grischuna sin:

gkb.ch/medien | [Twitter](#) | [Facebook](#) | [YouTube](#) | [Flickr](#) | [Xing](#)

Banca Chantunala Grischuna – il leader en il Grischun

La Banca Chantunala Grischuna porscha tut quai ch'i' dovra per ina banca universala moderna – per persunas privatas, l'economia ed il maun public. La banca occupa l'009 collavuraturas e collavuradors (stadi dals 31.12.2018). En il chantun Grischun cun sias numerusas vals e pliras linguas, è l'interpresa represchentada cun 52 agenturas, la sedia principala sa chatta a Cuira. La Banca Chantunala Grischuna è participada a la Banca Privata Bellerive SA a Turitg ed a la Albin Kistler SA a Turitg. En il resultat annual preschenta ella cun ina summa da bilantscha da CHF 26.5 milliardas in gudogn dal concern da CHF 185,1 milliuns. Il scrit da participaziun BCG è quotà a la bursa dapi ils 10 da settember 1985.

Termins

Rendaquint semestral 2019: 25 da fanadur 2019

Quint annual 2019: 7 da favrer 2020
